

MITI QĀRI

**MITI QÂRI FORAKAC IREC
3ÂJE BIRI**

<i>3âje fâri</i>	<i>3âje bemben</i>	<i>Rehac</i>
Mataio	Mat	1351
Mareko	Mar	1410
Luka	Luk	1445
Johane	Joh	1503
Aposolo Janere Binaŋ	Apo	1546
Roma	Rom	1602
Korinti I	Kor I	1627
Korinti II	Kor II	1652
Galata	Gal	1668
Efeso	Efe	1677
Filipi	Fil	1686
Kolosai	Kol	1693
Tesalonike I	Tes I	1700
Tesalonike II	Tes II	1706
Timoteo I	Tim I	1710
Timoteo II	Tim II	1718
Tito	Tit	1724
Filemon	File	1727
Hebiraio	Heb	1729
Jakobo	Jak	1749
Petoro I	Pet I	1756
Petoro II	Pet II	1764
Johane I	Joh I	1769
Johane II	Joh II	1776
Johane III	Joh III	1778
Juda	Jud	1780
Bararun Dâŋ	Bar	1783

MITI QÂRI

MUMUJAŊGEŊ DÂŊ

MITI QÂRIre papia qizec baju ware jujumbeneŋ irec zâŋe kecziŋuc râekicne: "Wofuŋ Jesu Kristo Ere Miti Qâri Zi". Papia irec zâŋe bembeneŋ muengpeneŋ ine "Miti Qâricne" me "MITI QÂRI".

Miti Qâri maŋnao papia kecziŋuc qâreŋkecicne forakac:

1. Jesure Biŋebian jahec â jahec.
2. Aposolo jaŋere Binaŋ.
3. Mitire fuŋne papia 21.
4. Bararuŋ Dâŋ.

Papia i sasawa qâturepene 27 ekac. Jesure Biŋebian i ŋic kecziŋuc jaŋe qâreŋkembij: Mataio, Mareko, Luka â Johane. Aposolo jaŋere Binaŋ i Lukazi qâreŋkewec, â Mitire Fuŋne papia i Paulozi bocjaha qâreŋkeme mitiŋic gâcne jaŋe wâc zuhuckerâ qâreŋkembij. Bararuŋ Dâŋ i ine aposolo Johanezi qâreŋkewec.

Papia zâŋene MITI QÂRI mukicne i fuŋnehec. Ŋifec Miti Raŋqane fokacte ŋifec Miti Qâricne muengpeneŋ hâcne. Miti Raŋqanere fuŋne i Tiri Papia Qizec zi fufuŋkenao mukicnere ira honenzepien, â Miti Qârire fuŋne ine zi piticne muburockepe mananaŋ. Miti Raŋqane i juwicnao jâmbân Anutuzi Israe ŋic jaŋehec zâzâfic ewecte fuawec. Miti Qâricne izi ine juku zâhec Jesu Kristo e mâreŋko waharâ mâreŋŋic nâŋâcne okacne hâmoŋuc kiŋte aka bârârieme Anutuhec zâzâfic qâricne fuawecte fuawec. Anutu e damen ira hâcne mâreŋŋic sasawa nâŋâcnehec zâzâfic ewec i zâzâfic fâri fideten-ne, eme mâreŋŋic nâŋâcne guruo bibianŋe hata fuawec. Ehame zâzâfic qâricnere maŋnao Jesu Kristore kikefuŋfâc nâŋâc dâŋ fâri qizecne bajuhuc sambânŋe zâzawie gie bahuc juengpeneŋ. Irec zâzâfic qâricne izi zâzâfic fâri binaŋ ekac. Â zâzâfic irec dâŋ sasawa, Miti Qârio hâcne fonârekac, izi bâbâpiaŋ dâŋ fârine efârekac.

Eme MITI QÂRI hâcne i mitiŋic wenizia qâreŋkembij? Erâ fuŋne weniguŋte, â ŋic weni jaŋe wosehuc weniguŋc enzepien muhuc qâreŋkem-bij? Eme irec qâreŋkepie dâŋ hatane â birine â fuŋqizecne â fâri ombânŋe weni weniguŋc jaha fuawec forakac? Irec fuŋne mananaŋte hâcne mumuzâwe dâŋ zizi fuakac. Dâŋ zizi hata hezâwe-nâreme Miti Qârio dâŋ forakac i hawarine fua tâcneme hone-hâmonzepeneŋ.

MITI QÂRI irec papia sasawa i aposolo â mitiŋic gâcne jaŋe qâreŋkem-bij. Erâ i Jesuzi mâreŋko jaŋehec juha biac mi embij, aricne. Erâ Jesuzi sambânko fehuc Tiri Mâro râe-jareme miti gie fuŋkehuc qâqâreŋ gie i wâc biac mi fuŋkembij. Jaŋe qanaŋ miti miczi murahuc juku zâhec qâreŋkembij. Erâ Jesure binaŋ sawa mâcne, miti fâri qizecnere mumu-jaŋgeŋ dâŋ, mitio jujure mumutâc dâŋ, uŋsawaŋ â muketen dâŋ erâ

findandân i Mârore qafenjo qârenke-fârembiŋ. Qâqâren ine Jesu e mârenko juha bâjâpehuc jumbiŋ ɲicguru i jaŋeraonec gâcnezi qârenkehapie gie bapa ɲic âgofâc-ɲenic gâcne moc moczi bafic-jopahuc qârenkembij wâc.

MITI QÂRI fâri wâmbugne â irec papia qizec miŋecgac bajungopenen i aposolo â babaficfâc-ɲenic jaŋe Jesure binaŋ â miti fuŋne qârenkepie izia mi fuawec. Jaŋe papia-ɲenic sasawa buc buc qârenkerâ opâ ruac guru jaŋerao râepie rame jaŋe iŋuc jaha papia buc buc bajuhuc tutumaŋ-ɲenicko â mitificko wose jumbiŋ. Ehuc papia mocwâc basaweniŋte opâ ruac jaŋe qâqâren gie sâko barâ papia bocjaha hae sâc râepie rafârewec. Eme papia moc raŋqan̄keme me suckeme honerâ papia qâricnao qârenke jumbiŋ wâc. Iŋuc ehuc juhapie aposolo jaŋe papia qârenkembij irec âkehoc-ticne bocjaha fuarâ fowec.

Miti Qârîre iŋuc epie haŋ bame mitiŋic gâcne zâhec fuarâ jumbiŋ jaŋe mitire fuŋne papia gâcne zuhuckerâ qârenkembij wâc. Mâc jaŋere papiazi aposolo jaŋe qârenkembij irec sâc mi ewec. Iŋuc fuame miti qaŋazu gâcne jaŋe fuŋkerâ papia sasawa mana wosâc ehuc bâtâc bambiŋ. Kecziŋuc muhuc iŋuc embiŋ: Dâŋ wenizi miti fârine ekac, â dâŋ wenizi ɲic mamanaonec fuawec. Jaŋe iŋuc muhuc papia sasawa mana wosâerâ aposolo â babaficfâc-ɲenic jaŋe qârenkembij irec fârine muhuc i sawa tutumaŋko â mitificko wose manac eniŋte mupaŋkembij. Gie i jara 100-200 damaŋ ɲonden ira fuŋkerâ bambiŋ. Mâc damaŋ ira Mataio, Mareko, Luka, Johane â Paulore papia sasawa erâ Johanere miti fuŋne I â Petoroŋe papia I irec sawa Anuture dâŋ mumbiŋ. Papia gâcne ine juku zâhec sawa zuhuckembij. Miti papia fuŋkerâ qâturembij damaŋ ira "Miti Qârî" zâŋe iŋuc fuawec. Juwicnao irec qâqâhâc zâŋe mi muhuc mâc kecziŋuc sawa mujumbiŋ: Aposolo jaŋere dâŋ me Biŋebian. Zi ine fuŋkerâ "MITI QÂRI", Iŋlisdânko "Niu Testamen", iŋuc mumbiŋ.

Jesure kikefuŋ fârine jaŋe ziŋuc hâcne mana tarambiŋ: Aposolo jaŋe Jesure Biŋebian â mitire fuŋne qârenkepie tarawec. Irec faicnao miti furune moc zuhuckerâ fufua i mi fokac. Jaŋe iŋuc mana tararâ ziŋuc mumbiŋ: Aposolo jaŋe Jesure Biŋebian â mitire fuŋne qârenkembij izi mocjaha fonâreha nâŋe ira mana utuckehuc mana tararâ maŋke junzepenen. Ehuc i sawa muratiehuc musawepene haŋ bame ɲic jaŋe manahuc biaŋkerâ bajunzepien. Jaŋe iŋuc muhuc aposolo â babaficfâc-ɲenic miti papia qârenkembij i sawa fosanaŋkeocte manasuhuc qâturepie Miti Qârî irec papia qizec fuawec hâcne. Gie i jara 200-400 damaŋ ɲonden ira bakicne.

Ųifec ine kecziŋuc mananzepenen: Aposolo jaŋe mefâri-ɲeniczi qârenkembij papia i jâmbân mocwâc mi fokac, i mârâc jaha jâmbân raŋqan̄kerâ omaewec. Aposolo â babaficfâc-ɲenic jaŋe miti papia Grikdânko qârenke-fârembiŋ. Ehuc gaŋ ruke â dâŋ qizecne tâmiric zuzuhuc jaha qârenke-fârembiŋ. Gaŋ ruke wiac i miti qaŋazu zâhec jumbiŋ jaŋe râe-fârembiŋ. Ehame aposolo tucfâc-ɲenic jaŋe aposolo jaŋere papia basaweniŋte papia qâricnao Grikdânko jaha qârenkembij. Eme miti papia i mâren gâcnao haŋ bame zâhec Romadânko â Aigita dâŋko â Siria dâŋko erâ dâŋ forakac sâc bâtikie-fârembiŋ.

Eme miti papia raŋqane jâmbân, mârâc jaha mezi qârenkekiecne i jaŋeraonec 4 ira me ira soŋkepie sifuckeme mâc fowarehuc juha juku zâhec jâmbân mocwâc bâfuakicne. Eme papia wiac izi hâcne miti qaŋazu gâcne hobetegn̄e â nengoc ɲesiŋ ɲejarehame bâtiŋnehuc papia qâricnao Grikdân-

ko jaha mocwâc qârenke-fârembiŋ. Eme miŋecgac papia irecnec honehuc dâŋ forakac sâc bâtikieengopier. Â nânâc Miti Qâri dâŋnâŋecko qârenke-kicne fokac i iŋuc jaha Grikdâŋkonec honehuc bâtikiekicne bajungopenenŋ.

Miti Qâri dâŋnâŋecko fuŋkerâ fuawec ine jara damen 1919 ira. Damerŋ ira hâcne Lukazi Jesure Biŋebianŋ qârenkewec i mecne, erâ Tesalonike ŋic jaŋere papia I â II i mâmâc dâŋnâŋecko bâtikiepie fuawec. Â MITI QÂRI irec papia qizec jâmbânŋ ine jara damen 1938 ira furu jaha Kâtedânko batikiepie fuawec.